



**UCAPAN
YB DATO' SERI MOHAMED AZMIN ALI
MENTERI HAL EHWAL EKONOMI
SEMASA MEMBENTANGKAN USUL MENGENAI
KAJIAN SEPARUH PENGGAL
RANCANGAN MALAYSIA KESEBELAS, 2016-2020:
KEUTAMAAN DAN PENEKANAN BAHARU
DI DEWAN NEGARA
PADA 3 DISEMBER 2018
JAM 11.30 PAGI**

PEMBERITAHU USUL

Tuan Yang di-Pertua,

Dengan nama Allah, Yang Maha Pemurah lagi Maha Penyayang, dengan sukacitanya saya berdiri di hadapan Dewan yang mulia ini untuk mohon mencadangkan bahawa mengikut peruntukan Peraturan Mesyuarat Dewan Negara 26 (3) Dewan ini mengambil ketetapan-ketetapan berikut:

“Bahawa Dewan ini,

menyedari akan cabaran untuk mengekalkan kestabilan ekonomi dan mencapai pertumbuhan yang mampan dengan mengambil kira perubahan trend ekonomi global, kedudukan kewangan Kerajaan serta pencapaian dua tahun pertama, 2016-2017 Rancangan Malaysia Kesebelas;

merestui usaha Kerajaan baharu pimpinan Pakatan Harapan untuk menambah baik dan memperkukuh agenda pembangunan negara berasaskan prinsip pertumbuhan dengan ekuiti ke arah mencapai status negara maju dan inklusif selaras dengan aspirasi Wawasan 2020;

meluluskan Kajian Separuh Penggal Rancangan Malaysia Kesebelas bagi tempoh 2018-2020 yang memberi keutamaan dan penekanan baharu ke atas dasar, strategi dan inisiatif sedia ada serta memperkukuh tadbir urus bagi mencapai pertumbuhan sosioekonomi yang lebih inklusif dan mampan ke arah meningkatkan kesejahteraan rakyat menurut Kertas Perintah CMD. 22 Tahun 2018; dan

Bahawa dalam meluluskan Kajian Separuh Penggal Rancangan Malaysia Kesebelas, Dewan yang mulia ini menyeru seluruh rakyat Malaysia berganding bahu untuk memastikan pertumbuhan ekonomi negara kekal mampan serta pengagihan kekayaan dibuat secara telus, adil dan saksama.”

Tuan Yang di-Pertua,

PENDAHULUAN

2. Alhamdulillah, saya bersyukur ke hadrat Allah SWT yang mengupayakan saya untuk membentangkan Kajian Separuh Penggal Rancangan Malaysia Kesebelas (KSP RMKe-11) di Dewan Negara. Usul ini telah dibentangkan di Dewan Rakyat pada 18 Oktober 2018 oleh Yang Amat Berhormat Perdana Menteri dan telah diluluskan pada 1 November 2018.

3. KSP RMKe-11 memperkenalkan anjakan dalam pemikiran pembangunan. Sebagai dokumen reformasi yang komprehensif, KSP RMKe-11 menggariskan agenda islah yang akan menyuntik kekuatan baru pada institusi awam.

4. Kekuatan baru ini akan memberdaya institusi awam dengan ciri-ciri ketelusan, akauntabiliti, integriti dan prinsip tata kelola yang memperkukuhkan usaha untuk membanteras rasuah dan penyalahgunaan kuasa.

5. Anjakan utama dalam pemikiran pembangunan yang terkandung di dalam dokumen ini digarisbawahi dengan perspektif pembangunan yang holistik dan tidak terbatas pada ukuran pertumbuhan ekonomi mahupun keluaran dalam negeri kasar (KDNK) semata-mata. Kerajaan berkeyakinan pembangunan yang holistik mampu menyempurnakan agenda pembangunan Bangsa Malaysia yang merdeka dan demokratik lagi berteraskan kebebasan dan keadilan serta mengutamakan kesejahteraan dan kesentosaan semua rakyat.

6. Meskipun masyarakat Malaysia rencam dari segi suku kaum, agama, bahasa dan kebudayaan, pembangunan yang adil lagi saksama akan mengukuhkan semangat kekitaan dan jati diri kebangsaan.

7. Justeru itu, kita mahu melihat pembangunan dari aspek peningkatan kuasa beli rakyat dan perlu dinikmati oleh semua rakyat. Kesenjangan pendapatan antara miskin dan kaya, antara kaum dan suku kaum, perlu dirapatkan agar tiada mana-mana golongan yang merasakan mereka terpinggir dari arus perdana pembangunan. Untuk menjamin pembangunan dinikmati oleh semua rakyat di mana sahaja mereka berada, jurang ekonomi antara wilayah wajar ditangani dengan saksama.

8. Pendekatan ini adalah menyahut tuntutan rakyat yang mahukan perubahan seperti yang disaksikan pada 9 Mei 2018.

9. Dengan mandat yang diberikan oleh rakyat, Kerajaan Pakatan Harapan beriltizam menggilap maruah Malaysia sebagai sebuah negara yang dihormati seantero dunia dan ekonominya kembali muncul sebagai Harimau Asia.

Tuan Yang di-Pertua,

10. Dokumen Kajian Separuh Penggal ini merupakan dokumen dasar pertama Kerajaan Pakatan Harapan yang menggariskan keutamaan dan penekanan baharu agar falsafah, dasar dan strategi pembangunan seiring dengan aspirasi rakyat.

11. Bahagian pertama menilai pencapaian dalam tempoh 2016-2017. Manakala, bahagian kedua menyemak semula sasaran, strategi dan inisiatif bagi tempoh 2018-2020 dengan mengambil kira perubahan trend ekonomi global dan kedudukan kewangan Kerajaan akibat legasi pentadbiran lama.

12. Tempoh akhir Rancangan Malaysia boleh dianggap sebagai satu tempoh peralihan dan tumpuan Kerajaan semasa tempoh ini adalah untuk melaksanakan pelbagai reformasi institusi. Pada masa yang sama, langkah-langkah pengukuhan kedudukan fiskal akan diimbangi dengan objektif pertumbuhan yang mampan.

13. Walaupun langkah pengukuhan fiskal akan meninggalkan kesan ke atas ekonomi, namun Kerajaan yakin kesan ekonomi berkenaan dijangka bersifat sementara.

PERSPEKTIF EKONOMI MAKRO

Prestasi Ekonomi, 2016-2017

14. Dalam tempoh dua tahun pertama Rancangan, 2016-2017, KDNK negara berkembang 5.1 peratus setahun dalam suasana inflasi pada kadar purata 2.9 peratus. Pertumbuhan ini didorong oleh permintaan agregat swasta yang kukuh, dengan pelaburan dan penggunaan swasta (*private consumption*) sebagai pemacu.

15. Dalam tempoh yang sama, pendapatan negara kasar (PNK) per kapita pada harga semasa juga meningkat pada kadar purata 6.7 peratus, daripada RM 36,119 (ataupun USD 9,248) pada tahun 2015 kepada RM 41,093 (ataupun USD 9,556) pada tahun 2017. Dari segi pariti kuasa beli (ataupun PPP), PNK per kapita Malaysia telah mencecah USD 28,650 seperti dianggarkan oleh Bank Dunia. Pencapaian ini meletakkan Malaysia dalam kumpulan 25 persentil teratas daripada 217 negara. Berdasarkan paras minimum negara berpendapatan tinggi yang ditetapkan oleh Bank Dunia sebanyak USD 12,056 bagi tahun 2017, terdapat jurang pendapatan 21 peratus yang perlu diatasi sebelum Malaysia berjaya melepasi status negara berpendapatan menengah tinggi.

16. Prestasi pertumbuhan ini secara umumnya merupakan antara yang terbaik di rantau ini. Sekiranya prestasi ini dikupas dan dilihat dengan lebih teliti, sebenarnya manfaat pertumbuhan selama ini tidak dirasakan sepenuhnya oleh semua lapisan masyarakat.

17. Sebagai Kerajaan yang bertanggungjawab, kita perlu melakukan semakan kenyataan (*reality check*) untuk memastikan dasar dan program akan menepati keperluan sebenar rakyat.

Tuan Yang di-Pertua,

Prospek Ekonomi, 2018-2020

18. Dalam tempoh 2018-2020, persekitaran luar dijangka akan lebih mencabar, terutamanya dengan ketidaktentuan harga komoditi dunia, perang perdagangan antara Amerika Syarikat dan China, dasar monetari Amerika Syarikat yang lebih ketat. Cabaran dalam negara juga perlu ditangani dengan melaksanakan *structural reform*, meningkatkan daya saing dan mengukuhkan modal insan.

19. Ekonomi negara bagi tempoh 2018-2020 disasarkan berkembang antara 4.5 hingga 5.5 peratus setahun, disokong terutamanya oleh permintaan dalam negeri. Permintaan swasta dijangka kekal menerajui pertumbuhan ekonomi, dengan pelaburan swasta dijangka berkembang 5.7 peratus setahun. Walaupun pertumbuhan ekonomi dan perdagangan dunia diunjurkan menyederhana, sumbangan bersih sektor luar kepada ekonomi dijangka masih positif.

20. Meskipun terdapat suara songsang yang memberi gambaran negatif terhadap Kerajaan Pakatan Harapan, keyakinan pasaran terhadap pengurusan ekonomi oleh Kerajaan Pakatan Harapan telah kembali pulih. Ini terbukti dengan kadar pertumbuhan ekonomi yang terus mampan sebanyak 4.4 peratus bagi suku ketiga tahun ini.

21. Pelaburan langsung asing (FDI) dalam sektor perkilangan juga kembali rancak di mana sejumlah RM 48.8 bilion telah diluluskan bagi sembilan bulan pertama tahun ini, berbanding RM 13.9 bilion bagi tempoh yang sama tahun lepas, iaitu peningkatan sebanyak 249 peratus.

22. Dalam laporan terkini Bloomberg, Malaysia ditempatkan di kedudukan teratas antara pasaran baru muncul (*emerging markets*) berdasarkan prestasi imbalan pembayaran akaun semasa yang mencatatkan lebih serta potensi dan penilaian pertumbuhan ekonomi yang masih stabil.

Tuan Yang di-Pertua,

KEUTAMAAN DAN PENEKANAN BAHARU, 2018-2020

23. Dalam tempoh akhir Rancangan Malaysia Ke-11, usaha akan dipergiat untuk meningkatkan daya tahan asas ekonomi negara dan kesejahteraan rakyat. Keutamaan dan penekanan baharu dalam Kajian Separuh Penggal RMKe-11 adalah berasaskan Enam Tonggak, iaitu:

Pertama: Mereformasi tadbir urus ke arah meningkatkan ketelusan dan kecekapan perkhidmatan awam;

Kedua: Memperkukuh pembangunan inklusif dan kesejahteraan rakyat;

Ketiga: Menuju ke arah pembangunan wilayah yang seimbang;

Keempat: Memperkasa modal insan;

Kelima: Mempertingkatkan kemampanan alam sekitar melalui pertumbuhan hijau; dan

Keenam: Memperkukuh pertumbuhan ekonomi.

Tuan Yang di-Pertua,

**TONGGAK 1 : MEREFORMASI TADBIR URUS KE ARAH
MENINGKATKAN KETELUSAN DAN KECEKAPAN
PERKHIDMATAN AWAM**

24. Buat pertama kalinya, Kerajaan meletakkan agenda reformasi tadbir urus sebagai tonggak dasarnya yang utama. Ini memandangkan terdapat banyak isu berkaitan dengan tadbir urus, ketelusan, integriti dan akauntabiliti. Perubahan yang ketara adalah diperlukan untuk memulihkan kepercayaan dan keyakinan rakyat kepada institusi kerajaan.

25. Di bawah tonggak ini, keutamaan akan diberikan kepada empat bidang utama iaitu menambahbaik tadbir urus pada semua peringkat kerajaan, meningkatkan integriti dan akauntabiliti perkhidmatan awam, menguatkuasakan pelaksanaan pengurusan kewangan awam secara berhemat dan memperkukuhkan penyampaian perkhidmatan awam.

26. Langkah tegas dan berkesan akan dilaksana untuk mempertingkatkan mekanisme semak dan imbang pada semua peringkat. Sistem pentadbiran undang-undang juga akan dimantapkan dengan mengasingkan peranan Peguam Negara dan Pendakwa Raya supaya diurus oleh dua individu yang berlainan.

27. Kuasa autonomi Parlimen akan dipertingkatkan dengan memperkenalkan semula Akta Perkhidmatan Parlimen 1963. Sistem jawatankuasa pemilih akan diwujudkan. Jawatankuasa ini akan memperaku pelantikan jawatan utama di SPRM, SPR, Jabatan Audit Negara dan Suruhanjaya Pelantikan Kehakiman. Suruhanjaya tertentu seperti SPRM dan SPR akan juga bertanggungjawab secara langsung kepada Parlimen.

28. Hubungan antara Kerajaan Persekutuan, kerajaan negeri dan kerajaan tempatan akan ditambah baik dengan mengembalikan semula semangat federalisme. Kerajaan negeri akan diperkasa melalui proses pengagihan kuasa pusat bagi beberapa fungsi termasuk pengangkutan awam, perkhidmatan sosial dan perlindungan alam sekitar.

29. Langkah segera untuk mereformasi sistem politik akan dilaksanakan. Tempoh perkhidmatan jawatan Perdana Menteri, Menteri Besar dan Ketua Menteri akan dihadkan kepada dua penggal. Perdana Menteri juga tidak akan memegang portfolio lain.

30. Penambahbaikan sistem pilihan raya akan dilaksanakan dengan membersihkan daftar pemilih, menambah baik proses pengundian pos dan menyediakan akses yang adil kepada media. Had umur mengundi akan diturunkan kepada 18 tahun dan undang-undang berkaitan pembiayaan politik akan diperkenal.

31. SPRM akan ditransformasi sebagai sebuah badan bebas sepenuhnya dan Akta SPRM 2009 akan dikaji semula secara menyeluruh. Undang-undang pencegahan rasuah juga akan diperkukuh dengan mengkaji semula Akta Perlindungan Saksi 2009 dan Akta Perlindungan Pemberi Maklumat 2010.

32. Ombudsman Malaysia akan ditubuhkan untuk menyiasat dan melaporkan secara bebas aduan awam terhadap agensi kerajaan. Bagi mempertingkatkan integriti Polis Diraja Malaysia (PDRM), Suruhanjaya Bebas Aduan dan Salah Laku Polis akan ditubuhkan.

33. Reformasi menyeluruh ke atas mekanisme pengurusan dana awam akan dilaksana termasuk mempertingkatkan sistem belanjawan negara, menambah baik pengurusan perolehan serta memperkukuh rangka kerja pengurusan prestasi, pemantauan dan penilaian. Pelaksanaan sistem perakaunan akruan juga akan dipercepat dan Akta Prosedur Kewangan 1957 akan dikaji semula.

34. Prosedur perolehan Kerajaan akan ditambah baik dengan memperkenalkan rangka kerja perundangan berkaitan yang lebih komprehensif dan berkesan, serta menguatkuasakan pelaksanaan tender terbuka. Kerajaan juga akan mengkaji semula rangka kerja projek perkongsian awam-swasta bagi mengoptimumkan sumber.

35. Demi menghapuskan pertindihan dan mengurangkan kerenah birokrasi serta mempercepat penyampaian perkhidmatan, aspek prosedur dan proses kerja akan dikaji semula dengan memanfaatkan teknologi terkini. Jentera perkhidmatan awam akan diperkemas ke arah meningkatkan kecekapan dan produktiviti melalui adaptasi model kecemerlangan perniagaan sebagai instrumen analisis prestasi kementerian dan agensi.

Tuan Yang di-Pertua,

**TONGGAK 2 : MEMPERKUKUH PEMBANGUNAN
INKLUSIF DAN KESEJAHTERAAN RAKYAT**

36. Pendekatan pembangunan inklusif akan dilaksanakan melalui penekanan kepada pertumbuhan dengan ekuiti untuk meningkatkan kesejahteraan semua rakyat.

37. Perlu ditegaskan bahawa peningkatan pendapatan sahaja tidak mencukupi kalau tidak diiringi dengan peningkatan kuasa beli. Bagi meningkatkan pendapatan dan kuasa beli rakyat, terutama isi rumah, daya keluaran produktiviti mestilah dinaikkan. Ini boleh dicapai melalui latihan kecekapan dan pengurusan yang lebih cekap dan bagi sektor pembuatan, penggunaan mesin dan teknologi yang moden dan canggih termasuk robotik dan automasi akan dipergiat.
38. Kita juga perlu prihatin dengan rakyat yang hilang mata pencarian akibat sakit, kemalangan dan lain-lain. Maka, sistem perlindungan sosial akan diperkukuh. Selain itu, program bantuan Kerajaan, khususnya yang melibatkan jaringan keselamatan sosial akan dikaji semula supaya lebih bersasar.

Tuan Yang di-Pertua,

39. Iltizam Kerajaan terhadap Agenda Pemerkasaan Bumiputera terus teguh. Misalnya, peruntukan belanjawan MARA bagi tahun 2019 kekal pada RM 3.7 bilion. Beberapa agensi lain yang terlibat dalam pembangunan luar bandar dinaikkan peruntukannya. Peruntukan Yayasan Peneraju Pendidikan Bumiputera ditingkatkan dari RM 90 juta kepada RM 210 juta.

40. Kita juga harus mereformasikan Agenda Pemerkasaan Bumiputera dan tidak lagi meneruskan amalan “*business as usual*”.

41. Antara inisiatif yang akan diambil adalah perubahan minda yang positif dan penerapan nilai murni, pengukuhan keberkesanan institusi dan program, pemerkasaan modal insan dan pengukuhan pendidikan dan latihan bagi mendapatkan pekerjaan bergaji tinggi.

42. Kawalan efektif, pemilikan korporat serta pemilikan kekayaan yang diterajui oleh Permodalan Nasional Berhad akan terus diberikan keutamaan. Melalui agensi-agensi Bumiputera seperti TERAJU, perusahaan kecil dan sederhana Bumiputera akan terus diperkasa supaya lebih berdaya tahan dan mampan serta mampu menembusi pasaran global.

43. Kongres Masa Depan Bumiputera dan Negara yang diadakan pada 1 September 2018 telah menghasilkan 63 resolusi yang merangkumi pelbagai dimensi. Kerajaan akan memastikan agenda pemerkasaan ekonomi Bumiputera dapat membentuk generasi Bumiputera baharu yang berdaya tahan serta berpegang teguh kepada nilai moral, integriti serta sikap rajin bekerja.

Tuan Yang di-Pertua,

44. Sebagai Kerajaan yang prihatin ke arah mewujudkan masyarakat yang saksama, usaha akan dipertingkatkan untuk memperkasa kumpulan minoriti. Program khusus akan dilaksanakan bagi suku-suku kaum Sabah dan Sarawak dan juga Orang Asli, di kawasan luar bandar dan pedalaman. Antara inisiatif yang akan dilaksanakan termasuk penawaran lebih banyak program dan peluang pendidikan, latihan kemahiran dan keusahawanan. Bagi kumpulan tertentu dalam kalangan masyarakat India dan Cina, beberapa program khusus akan dilaksanakan bagi membangunkan potensi ekonomi mereka dan membasmi kemiskinan.

45. Pelbagai program dan inisiatif akan dilaksanakan untuk meningkatkan kesejahteraan kanak-kanak, belia, wanita, institusi keluarga, warga kurang upaya dan warga emas. Antaranya ialah membangunkan Pelan Hala Tuju Kesejahteraan Kanak-Kanak serta program pembangunan dan pemerksaan belia. Bagi mempertingkat penglibatan wanita dalam pasaran buruh, majikan digalakkan untuk menyedia perkhidmatan penjagaan kanak-kanak dan aturan kerja yang anjal.
46. Selain itu, program pembangunan keluarga seperti kemahiran keibubapaan, menyemak semula dasar dan perundangan yang berkaitan orang kelainan upaya dan menggalakkan persekitaran penuaan yang aktif bagi warga emas akan dilaksanakan.

47. Pelbagai inisiatif akan dilaksanakan bagi meningkatkan kuasa beli rakyat dan mengurangkan beban peningkatan kos sara hidup. Tumpuan juga akan diberi untuk membendung kenaikan harga barang melalui pelbagai langkah seperti kawalan harga, mempergiat penguatkuasaan dan mempertingkatkan tahap konsumerisme.
48. Perumahan adalah penting untuk kesejahteraan keluarga. Sebanyak 200,000 unit rumah mampu milik disasarkan dalam tempoh 2018-2020 dengan menggalakkan penglibatan yang lebih luas oleh sektor swasta. Majlis Perumahan Mampu Milik Negara akan ditubuhkan untuk menyelaras pengurusan perumahan mampu milik awam.

49. Kerajaan komited untuk memperkukuh sistem penyampaian penjagaan kesihatan. Antaranya, mewujudkan dasar kesihatan negara, meningkatkan kapasiti modal insan dan kemudahan kesihatan serta mengkaji model skim penjagaan kesihatan ke arah mewujudkan skim pembiayaan kesihatan nasional.

50. Dalam meningkatkan kapasiti kemudahan kesihatan awam, sebuah pusat kanser wilayah utara akan dibina sebagai pelengkap kepada Institut Kanser Negara. Kerajaan juga akan mewujudkan sebuah pusat kawalan dan pencegahan penyakit kebangsaan di Nilai, Negeri Sembilan untuk mengesan, mencegah dan mengatasi ancaman penyakit.

51. Perbandaran dan perindustrian yang pantas memberikan tekanan kepada kesejahteraan mental. Satu pelan tindakan akan dirangka bagi meningkatkan kesedaran masyarakat terhadap kesihatan mental. Selain itu, dasar dan peraturan baharu akan digubal untuk mengawal selia produk, teknologi dan perkhidmatan penjagaan kesihatan dalam talian.

52. Tumpuan akan diberi untuk mengukuh keupayaan dan kapasiti agensi penguatkuasaan dan keselamatan serta mempergiat usaha pencegahan jenayah. Bagi mengekang pencerobohan sempadan, kawalan terutamanya di pintu masuk negara akan dipertingkatkan.

53. Kerajaan ingin menegaskan bahawa perpaduan nasional dan kesepaduan sosial akan terus dipupuk untuk menjamin keharmonian negara. Kerajaan tidak akan berkompromi sama sekali dengan mana-mana pihak yang cuba menggugat perpaduan dan kehidupan harmoni di kalangan rakyat. Kerajaan mengucapkan terima kasih dan tahniah kepada pasukan keselamatan yang bertindak pantas menangani kejadian rusuhan di Kuil Sri Maha Mariamman Seafield baru-baru ini.
54. Kenyataan tegas dan segera Yang Berhormat Menteri Dalam Negeri dan usul khas Yang Amat Berhormat Perdana Menteri di Dewan Rakyat menampilkan kepemimpinan tegas dan bertanggungjawab dalam menangani kejadian tersebut yang boleh menggasir keyakinan dan keharmonian.

55. Dalam perjuangan mencapai status negara maju, kita, khususnya generasi muda, tidak harus lupa aspek nilai dan jati diri. Sehubungan itu, peranan keluarga, sekolah dan komuniti akan diperkukuh bagi mempromosi nilai murni dan memupuk budaya kebangsaan.
56. Sukan akan terus menjadi platform untuk menggalak gaya hidup aktif dan sihat serta menyatupadukan rakyat. Oleh itu, lebih banyak kemudahan sukan dan rekreasi akan dibangun dan dinaik taraf. Pendekatan baharu akan juga dilaksanakan bagi menggalakkan kecemerlangan sukan dan gaya hidup sihat.

Tuan Yang di-Pertua,

TONGGAK 3 : MENUJU KE ARAH PEMBANGUNAN WILAYAH YANG SEIMBANG

57. Semua negeri perlu maju bersama. Kerajaan Pakatan Harapan tidak akan membiarkan mana-mana negeri tertinggal di belakang.

58. Oleh itu, Kerajaan memperkenalkan kembali agenda pembangunan wilayah yang seimbang sebagai keutamaan. Selaras dengan ini, Kerajaan akan memastikan peruntukan pembangunan yang lebih saksama kepada negeri Sabah, Sarawak, Kelantan, Terengganu, Kedah dan Perlis supaya mencapai pembangunan yang lebih setara.

59. Untuk memperkukuh pembangunan ekonomi wilayah, perancangan pembangunan pada peringkat nasional, wilayah dan negeri perlu diperkemas. Penyelarasan antara negeri bagi penyediaan infrastruktur akan dipertingkatkan untuk mengoptimum penggunaan sumber serta memoden dan mempelbagaikan asas ekonomi bagi merencanakan pertumbuhan ekonomi.
60. Kerajaan akan memastikan masyarakat luar bandar tidak ketinggalan dalam arus pembangunan termasuk membina rangkaian jalan raya, akses kepada bekalan air bersih dan terawat serta meluaskan akses bekalan elektrik. Sementara itu, infrastruktur digital akan dipertingkatkan untuk memperluas liputan dan menambah baik kualiti jalur lebar.

61. Aktiviti ekonomi setempat di luar bandar akan ditingkatkan untuk menjana pendapatan dan mewujudkan peluang pekerjaan serta perniagaan. Aktiviti ekonomi luar bandar yang mampan seperti industri asas tani, ekopelancongan dan agropelancongan juga akan digalakkan. Bantuan akan diberi termasuk menyediakan premis perniagaan untuk usahawan mikro serta perusahaan kecil dan sederhana (PKS) di luar bandar.

62. Sabah dan Sarawak berpotensi untuk menjana pertumbuhan ekonomi lebih tinggi dengan mengoptimumkan sumber asli yang ada. Untuk itu, Kerajaan akan mengagihkan pendapatan minyak dan gas secara saksama mengikut perundangan sedia ada. Satu Jawatankuasa Khas Kabinet telah ditubuhkan untuk mengkaji semula dan memantau pelaksanaan yang wajar bagi Perjanjian Malaysia 1963.
63. Kerajaan juga akan menyediakan 7,000 unit rumah mampu milik serta menaik taraf 400 buah sekolah daif. Dari segi kemudahan kesihatan, tiga buah hospital akan dinaik taraf, iaitu di Papar, Miri dan Lawas.

64. Pembangunan tanah adat adalah penting untuk mewujudkan aktiviti ekonomi dan menjana pendapatan masyarakat setempat. Oleh itu, kerjasama antara kerajaan negeri, agensi berkaitan, pemilik tanah dan pelabur akan dipertingkatkan. Aktiviti pengukuran dan pemetaan Hak Tanah Adat akan dilaksanakan bagi membolehkan tanah adat dibangunkan.

Tuan Yang di-Pertua,

TONGGAK 4 : MEMPERKASA MODAL INSAN

65. Kerajaan akan terus memberi penekanan untuk membangunkan modal insan bagi memenuhi keperluan industri dan menyokong pertumbuhan ekonomi.

66. Kerajaan akan mereformasi pasaran buruh ke arah mewujudkan pekerjaan berkemahiran yang menawarkan gaji yang tinggi, dengan menggalakkan automasi dan inovasi, menerima guna teknologi baharu serta mengkomersialkan harta intelek. Pelaburan berkualiti tinggi juga akan diberi keutamaan untuk mewujudkan lebih banyak pekerjaan berkemahiran.
67. Bagi meningkatkan gaji dan upah, semakan secara berterusan ke atas dasar gaji minimum dan pembentukan Indeks Gaji Kebangsaan akan dilaksanakan. Perbezaan kadar gaji minimum antara Semenanjung Malaysia, Sabah dan Sarawak telah berjaya ditangani. Di samping itu, perluasan Sistem Upah yang Dikaitkan dengan Produktiviti akan dipergiatkan.

68. Kerajaan berazam untuk mengurangkan kebergantungan kepada pekerja asing melalui penambahbaikan pengurusan pekerja asing. Antara langkah yang dicadangkan adalah mengenakan sistem levi berperingkat yang progresif berasaskan kepada jumlah pekerja asing yang digaji.
69. Kerajaan akan mengukuhkan hak pekerja dan meningkatkan penyertaan wanita dalam tenaga buruh bagi menambah baik kecekapan dan produktiviti buruh melalui kajian semula undang-undang perburuhan dan pelaksanaan Sistem Insurans Pekerjaan yang menyeluruh. Pekerja yang diinsuranskan akan menerima manfaat yang merangkumi elaun mencari pekerjaan, latihan, penempatan pekerjaan dan kaunseling kerjaya.

70. Adalah amat penting kita menyediakan pekerja dan golongan profesional menghadapi *disruption* yang bakal dibawa oleh Revolusi Perindustrian Keempat. Revolusi ini akan menghapuskan banyak jenis pekerjaan seperti buruh manual dalam sektor pembuatan, tetapi juga akan mencipta peluang pekerjaan baharu seperti penyelenggaraan dan kejuruteraan robotik dan automasi.
71. Kerajaan akan meningkatkan akses yang saksama kepada pendidikan dan latihan yang berkualiti. Bagi pendidikan asas, usaha akan ditumpu kepada peningkatan pendidikan sains, teknologi, kejuruteraan dan matematik (STEM), penguasaan Bahasa Inggeris dan peningkatan kemahiran berfikir aras tinggi.

72. Bagi menetapkan standard pendidikan yang lebih tinggi serta memupuk nilai murni dan budaya kerja yang positif seperti diamalkan di Jepun, Kerajaan akan mengkaji semula kedua-dua Pelan Pembangunan Pendidikan Malaysia. Sementara itu, Akta Universiti dan Kolej Universiti 1971 akan dikaji semula dengan menggantikannya dengan perundangan baharu yang menyeluruh dan lebih baik ke arah mewujudkan kebebasan akademik, bersuara dan berpersatuan.
73. Dalam tempoh akhir Rancangan, Kerajaan akan melaksanakan Projek Pembinaan Bangunan bagi Pusat Perkhidmatan Rawatan Pesakit Luar dan Pakar di Pusat Perubatan Universiti Malaya, Kompleks Fakulti Perubatan Veterinar di Universiti Malaysia Kelantan dan Hospital Pengajar di Universiti Malaysia Sarawak.

74. Kerajaan juga akan meningkatkan kualiti tenaga pengajar institusi pendidikan tinggi dengan meneruskan penajaan Skim Latihan Akademik untuk mereka melanjutkan pengajian di peringkat PhD.
75. Kerajaan hari ini komited untuk meningkat keupayaan belia dalam bidang pendidikan dan latihan teknikal dan vokasional (TVET) bagi memenuhi keperluan industri berteknologi tinggi. Kerajaan akan meneruskan program latihan prapekerjaan di bawah skim Latihan Bakal Pekerja dengan menyediakan dana bagi membantu membiayai yuran program di pusat pembangunan kemahiran negeri.

76. Kerjasama industri dan academia yang lebih erat adalah penting untuk memadankan penawaran dengan permintaan. Keutamaan akan diberi untuk membangunkan kemahiran berkaitan industri dengan melaksanakan program berasaskan industri dan mengiktiraf teknologis sebagai profesional. Kerajaan juga akan menggalakkan institusi TVET untuk mempelajari dan menerima guna amalan terbaik daripada Jepun, khususnya melalui penerapan pengetahuan dan kemahiran teknologi terkini dalam pengajaran dan pembelajaran.

Tuan Yang di-Pertua,

TONGGAK 5 : MEMPERTINGKAT KEMAMPANAN ALAM SEKITAR MELALUI PERTUMBUHAN HIJAU

77. Kerajaan komited untuk memastikan pembangunan sosioekonomi turut memberi penekanan kepada aspek perlindungan alam sekitar, selaras dengan Agenda 2030 untuk Pembangunan Mampan.

78. Tadbir urus akan diperkukuh bagi memudah cara peralihan ke arah pertumbuhan hijau dan pengurusan sumber yang lebih baik. Sehubungan ini, dasar, perundangan, standard dan garis panduan berkaitan alam sekitar dan sumber asli akan dikaji semula atau diwujudkan dan ditanda aras dengan amalan terbaik antarabangsa.

79. Semua projek pembangunan perlu mematuhi standard perlindungan alam sekitar dan garis panduan pembangunan. Dalam hal ini, rangka kerja institusi akan diperkukuh, manakala kapasiti dan keupayaan pemantauan serta penguatkuasaan akan ditambah baik. Pelaksanaan pematuhan sendiri terpimpin dalam kalangan industri akan diperluas, manakala masyarakat dan pihak berkepentingan akan terus digalakkan untuk menghargai dan melindungi alam sekitar.

80. Usaha untuk melindungi, memulihara dan memulihkan khazanah strategik negara adalah penting bagi memastikan kemampanan dan sumbangan berterusan kepada pembangunan. Pewartaan lebih banyak kawasan terestrial, air daratan, pesisir pantai dan marin sebagai kawasan perlindungan akan dipergiat. Bagi menangani konflik antara manusia dengan hidupan liar, lebih banyak laluan untuk hidupan liar akan disediakan.
81. Langkah mitigasi perubahan iklim akan dipergiat bagi memenuhi komitmen di bawah Perjanjian Paris. Dalam hal ini, pelan tindakan mitigasi nasional akan disediakan dan pelaksanaan cukai karbon akan diteliti.

82. Sementara itu, langkah adaptasi perubahan iklim akan terus dilaksanakan dan pelan tindakan akan dirangka sebagai panduan dalam perancangan dan penyelarasan langkah adaptasi di seluruh negara.
83. Penerimgunaan konsep penggunaan dan pengeluaran mampan akan digalakkan melalui perluasan inisiatif perolehan hijau kerajaan dan inisiatif merubah sisa kepada kekayaan ataupun sisa kepada tenaga. Manakala, penggunaan plastik sekali guna akan dikurangkan.

84. Kebergantungan kepada bahan api fosil akan dikurangkan melalui peningkatan sumbangan tenaga boleh baharu (*renewable*) dalam penjanaan elektrik. Penjanaan elektrik daripada biojisim dan biogas akan digalakkan, manakala daya maju teknikal dan potensi aplikasi komersial teknologi baharu akan diteroka seperti grid mikro dan penyimpanan tenaga dalam bateri. Di samping itu, pengurusan permintaan tenaga akan terus diperkukuh melalui penyediaan pelan induk bagi meningkatkan kecekapan dan penjimatan tenaga. Penggunaan sistem LED akan ditingkatkan.

85. Keupayaan pengurusan risiko bencana akan ditingkat melalui integrasi langkah pengurangan risiko bencana dalam perancangan dan pembangunan. Kesiapsiagaan menghadapi bencana juga akan dipertingkatkan melalui pembangunan sistem bersepadu bagi ramalan cuaca dan banjir serta amaran awal banjir. Keupayaan tindak balas agensi berkaitan bencana dan komuniti juga akan dipertingkatkan bagi mengelakkan kehilangan nyawa dan kerosakan harta benda.

Tuan Yang di-Pertua,

TONGGAK 6 : MEMPERKUKUH PERTUMBUHAN EKONOMI

86. Momentum pertumbuhan ekonomi akan diperkukuh dengan merangsang aktiviti ekonomi dan menggalakkan pelaburan swasta. Tumpuan akan diberi kepada pengukuhan asas ekonomi berlandaskan inovasi, kreativiti dan aktiviti nilai ditambah tinggi ke arah meningkatkan produktiviti dan daya saing industri.

87. Sektor perkhidmatan akan menjadi pemacu utama pertumbuhan ekonomi negara. Oleh itu, sektor perkhidmatan yang berintensif pengetahuan akan dipertingkatkan. Usaha juga akan dipergiat bagi mewujudkan ekosistem yang dinamik, menggalakkan penerimgunaan teknologi terkini dan e-dagang serta memanfaatkan platform digital untuk mempromosi produk dan perkhidmatan bagi menembusi pasaran antarabangsa. Selain itu, Malaysia akan dijenamakan semula sebagai destinasi pelancongan utama dan produk ekopelancongan tempatan akan dimanfaatkan untuk menarik lebih ramai pelancong.

88. Kerajaan akan menggalakkan peralihan sektor pembuatan ke arah pengeluaran produk yang mempunyai nilai ditambah yang tinggi, pelbagai dan kompleks. Subsektor pembuatan yang mempunyai potensi pertumbuhan tinggi, iaitu aeroangkasa dan peranti perubatan, juga akan diutamakan. Pihak industri perlu meningkatkan produktiviti dengan mempercepat penggunaan robotik, automasi dan inovasi, menjalankan penyelidikan dan pembangunan serta melaksanakan amalan pengeluaran mampan.

89. Projek kereta nasional ketiga juga mempunyai peranan strategik dalam melonjakkan inovasi. Seperti yang disebutkan oleh Yang Amat Berhormat Perdana Menteri sebelum ini, pembangunan kereta nasional bukan sekadar untuk mengeluarkan kereta. Ia juga satu pemangkin untuk meningkatkan keupayaan kejuruteraan dan membina ekosistem teknikal dan berimpak tinggi untuk bersaing di peringkat global.
90. Projek ini mengambilkira perkembangan terbaru dalam teknologi automotif termasuk *autonomous vehicle*. Projek ini juga bersifat hijau kerana akan memberi tumpuan kepada penggunaan tenaga boleh baharu (*renewable energy*).

Tuan Yang di-Pertua,

91. Kerajaan akan meneruskan usaha untuk meningkatkan sumbangan sektor pertanian terhadap ekonomi negara. Ini termasuklah sasaran meningkatkan subsektor agromakanan bagi mencipta peluang pekerjaan, memupuk keusahawanan dan sekaligus menjana kekayaan baharu negara melalui sektor pertanian yang merupakan penyumbang ketiga terpenting kepada pendapatan negara.

92. Pameran Pertanian, Hortikultur dan Pelancongan Agro Malaysia 2018 (MAHA 2018) telah berjaya menarik lebih tiga juta pengunjung dan melibatkan hampir 2,000 pempamer masyarakat petani, penternak, nelayan dan usahawan industri asas tani yang memperkenalkan produk dan perkhidmatan.
93. Ini membuktikan bahawa sektor pertanian bukan sekadar satu aktiviti tradisional tetapi mempunyai potensi yang cukup besar untuk meningkatkan sumbangan kepada ekonomi negara dan menjamin kemampuan bekalan makanan negara (*food security*).

94. Negara Malaysia merupakan sebuah negara pertanian sejak kemerdekaan dan pada tahun 1987, kita telah beralih kepada status negara perindustrian apabila peratusan sumbangan sektor pembuatan kepada KDNK telah melebihi sumbangan pertanian dan perkara ini berterusan sehingga kini. Kerajaan hari ini mengambil ikhtiar mempergiatkan sinergi antara sektor-sektor pertanian dan perindustrian demi pembangunan ekonomi negara.

Tuan Yang di-Pertua,

95. Sejajar dengan pembangunan global yang menyaksikan anjakan paradigma, yang dikenali sebagai Revolusi Perindustrian Keempat (4IR), Malaysia perlu bersiap sedia untuk menghadapi cabaran masa depan. Pada 31 Oktober yang lalu, Yang Amat Berhormat Perdana Menteri telah melancarkan Dasar Negara Mengenai Industri 4.0 yang dikenali sebagai *Industry4WRD*. Dasar tersebut menggariskan pelan tindakan penggunaan teknologi berkaitan Industri 4.0 untuk meningkatkan produktiviti dan daya saing sektor pembuatan. Tumpuan juga akan diberi kepada beberapa bidang seperti bioteknologi, nanoteknologi, teknologi digital, teknologi hijau dan teknologi neuro yang akan melonjakkan kemajuan sains, teknologi dan inovasi.

96. Melalui dasar ini, menjelang 2025, Kerajaan menjangkakan Malaysia akan menjadi salah satu destinasi utama industri berteknologi dan ditempatkan dalam kumpulan 30 tertinggi dalam *Global Innovation Index*.
97. Cyberjaya selaku nukleus Koridor Raya Multimedia akan diberi nafas baharu sebagai pemangkin utama dalam memacu pembangunan inovasi dan teknologi di Malaysia. Antara lain, ekosistem inovasi akan diperkukuhkan, bandar pintar diwujudkan dan FDI teknologi akan digalakkan supaya bertapak di Cyberjaya.

Tuan Yang di-Pertua,

98. Kerajaan akan memastikan infrastruktur yang disediakan adalah berkualiti dari segi integrasi, liputan dan ketersambungan serta kemampuan dan kemampanan. Bagi memperkukuh ketersambungan merentas wilayah, pembinaan lebuh raya di luar kawasan Lembah Klang akan terus diberi keutamaan, antaranya meneruskan pelaksanaan jajaran *Central Spine Road* dan Lebuhraya Kota Bharu-Kuala Krai. Selain itu, pembesaran terminal, pemanjangan landasan dan penambahbaikan kemudahan bagi lapangan terbang terpilih akan dilaksana. Misalnya, menaik taraf kemudahan di Lapangan Terbang Antarabangsa Langkawi.

99. Pertumbuhan logistik dan fasilitasi perdagangan akan dipertingkatkan melalui inisiatif uCustoms, gerbang tunggal yang menyediakan proses bersepadu dan lengkap bagi pelepasan kargo, yang akan dilancarkan pada awal tahun 2019. Inisiatif ini akan meningkatkan kecekapan dan produktiviti serta daya saing pemain logistik Malaysia.
100. Langkah untuk menambah baik infrastruktur digital akan terus dilaksanakan. Ke arah ini, kapasiti dan liputan jalur lebar akan terus dipertingkatkan menerusi *National Fiberisation and Connectivity Plan* untuk mencapai sasaran 95 peratus liputan jalur lebar di kawasan berpenduduk.

101. Usaha menambah baik perkhidmatan bekalan air kepada negeri yang mempunyai rizab margin rendah seperti Kedah dan Perlis akan diberi keutamaan melalui menaik taraf loji sedia ada dan membina loji baharu. Pembinaan loji rawatan kumbahan serantau dan berpusat di bandar utama seperti Alor Setar, Kuantan dan Taiping akan dilaksanakan.

102. Kerajaan akan memastikan bekalan tenaga yang berdaya harap dan mampan bagi mengukuhkan jaminan tenaga dan meningkatkan kecekapan bekalan tenaga. Ini akan dicapai melalui pembinaan fasiliti terapung gas asli cecair yang kedua milik PETRONAS di luar pesisir pantai Sabah serta projek *Refinery and Petrochemical Integrated Development* (RAPID) di Pengerang, Johor.

103. Kecekapan dan daya harap bekalan elektrik di Semenanjung Malaysia akan ditingkatkan menerusi pelaksanaan fasa kedua Kawal Selia Berasaskan Insentif (IBR), dari tahun 2018 hingga tahun 2020. Pelaksanaan IBR akan diperluas ke Sabah dalam tempoh akhir Rancangan. Sementara itu, pembinaan loji janakuasa baharu akan dilaksanakan melalui bidaan kompetitif supaya lebih telus dan wujud persaingan sihat dalam kalangan pemain industri.

Tuan Yang di-Pertua,

MALAYSIA DAN DUNIA

104. Kebangkitan rakyat pada 9 Mei 2018 menolak kleptokrasi dan memilih demokrasi telah mendapat perhatian dunia. Fenomena yang bersejarah ini memberikan kekuatan moral untuk segera membangunkan Malaysia sebagai sebuah negara yang maju, makmur dan demokratik serta pada masa yang sama, mempunyai wibawa melonjakkan kedaulatan negara dalam arena global.

105. Kepimpinan Yang Amat Berhormat Perdana Menteri telah mendapat penghormatan di kalangan pemimpin-pemimpin dunia. Kehadiran Yang Amat Berhormat Perdana Menteri dalam forum-forum antarabangsa seperti Sesi Ke-73 Perhimpunan Agung Pertubuhan Bangsa-Bangsa Bersatu di New York, Sidang Kemuncak ASEAN Ke-33 di Singapura, Mesyuarat Pemimpin-Pemimpin Ekonomi APEC (AELM) Ke-26 di Port Moresby serta lawatan-lawatan rasmi ke Republik Rakyat China dan Jepun telah mendapat liputan dan ulasan yang luar biasa dan membanggakan.
106. Penghormatan yang diberikan kepada Yang Amat Berhormat Perdana Menteri sebenarnya adalah pengiktirafan dunia kepada rakyat Malaysia yang telah berani membawa perubahan secara aman dan tertib setelah 61 tahun merdeka.

107. Berdasarkan perkembangan hari ini, Malaysia berada dalam kedudukan yang kukuh untuk memainkan peranan yang lebih produktif dan efektif di rantau ini, khususnya melalui kerjasama pertubuhan ekonomi serantau seperti '*Indonesia-Malaysia-Thailand Growth Triangle*' (IMT-GT), '*Brunei Darussalam-Indonesia-Malaysia-Philippines East ASEAN Growth Area*' (BIMP-EAGA) dan '*Joint Ministerial Committee for Iskandar Malaysia*' (JMCIM).

108. Dalam mesyuarat tahunan BIMP-EAGA di Negara Brunei Darussalam minggu lalu, negara-negara BIMP-EAGA telah bersetuju untuk memperkukuhkan lagi kerjasama antara BIMP-EAGA dengan Republik Rakyat China (RRC) kerana peningkatan RRC sebagai kuasa ekonomi baharu dunia perlu dimanfaatkan oleh BIMP-EAGA bagi pembangunan kawasan serantau ini.

PENUTUP

Tuan Yang di-Pertua,

109. Rakyat telah membuat satu keputusan yang matang dan berani semata-mata untuk membawa perubahan demi sebuah negara yang demokratik, makmur dan berwibawa. Maka, menjadi tanggungjawab moral kepada kita semua tanpa mengira warna politik untuk membawa mandat ini dan memenuhi aspirasi rakyat. Ini adalah amanah yang kita tidak boleh khianati.

110. Dokumen ini menterjemahkan iltizam Kerajaan Pakatan Harapan untuk melaksanakan amanah rakyat yang menuntut reformasi institusi dan penyusunan semula keutamaan ekonomi agar lebih mampan dan peduli rakyat. Dasar dan strategi baharu ekonomi Kerajaan Pakatan Harapan akan meletakkan kembali ekonomi Malaysia di atas landasan yang kukuh.
111. Matlamat akhir hala tuju baharu ini bukan sekadar menghasilkan kemakmuran ekonomi tetapi merangkumi agenda pembangunan bangsa Malaysia yang demokratik, adil dan bersatu.

112. Akhirul kalam, saya menyeru semua Ahli-Ahli Yang Berhormat untuk membahaskan usul ini secara bertanggungjawab dengan dhamir yang suci bagi menterjemah aspirasi rakyat supaya menjadi kenyataan.

Tuan Yang di-Pertua,

Saya mohon mencadangkan.